



PNDS

Hamutuk Ita
Dezenvolve nasaun

Novembru 2015

Konstrusaun Bee Mos husi Komunitade liu husi programa PNDS, iha Suku Betano

Vice Ministru Administrasaun Estatál, Tomas do Rasário Cabral Inagura Projetu PNDS Iha Munisípiu Manufahi

Iha inagurasaun ne'e, Vice Ministru da Administrasaun Estatál, fó lia menon ba comunidade Suku Betano, atu tau atensaun masimu ba konstrusaun bee mós ne'ebé hari'i ona.

"Komunidade tenke iha iniciativa rasik atu halo manutensaun ba bee ida ne'e, atu nune'e bee mós ida ne'e bele utiliza ba iha tempu naruk nia laran", Tomás do Rosário Cabral, Vise Ministru da Administrasaun Estatál.

Iha oportunidade nee Xefe Suku Betano, Saturnino Tilman, hato'o agradese ba atensaun husi governu tanba bele responde ona comunidade nia ejijénsia liu-liu comunidade husi Aldeia Rai-Fusa ho Aldeia Leo-Ai, ne'ebé enfrenta problema bee mós desde tempu okupasaun.

Komunidade aldeia rua refere sente haksolok, tanba problema bee mós ne'ebé sira enfrenta iha tempu naruk liu ba, bele rezolve ona liu husi implementasaun programa PNDS.

"Antes ne'e ami tenke la'o ain ba kuru bee iha bee matan ida ne'e ho distánsia kilo metru ida resin, maibé agora bee monu ona iha ami nia uma oin, ami kontente tebes", Marcos Pereira, Xefe Aldeia Rai-Fusa.

Komunidade Aldeia Rai-Fusa ho Aldeia Leo-Ai, Suku Betano, Asesu Ona Bee Mós

Komunidade Suku Betano, liu-liu Aldeia Rai-Fusa ho Aldeia Leo-Ai sente kontente tebes, tanba bele ona asesu diretamente ba be'e mós iha Suku laran.

"Antes ne'e aldeia rua refere, durante iha tempu okupasaun, mós iha tempu ukun an, suspira tebes-tebes ba be'e mós, ho programa PNDS, bele realiza be'e to'o iha ami nia uma oin, no ami kontente tebe-tebes", Jose da Conceição, nu'udar Lia na'in.

Iha tempu naruk nia laran be'e mós sai hanesan preokupasaun bo'ot ba comunidade sira iha Suku Betano, comunidade sira tenke la'o dok ba iha be'e matan Risiko hodi kuru be'e ba sira nia moris loro-loron maske asesu ho la'o ain ho nia distánsia km 1 (ida) resin.

Be'e matan Risiko hanesan be'e matan lulik ida ne'ebé iha nanis ona iha tempu bei'ala sira, be'e ida ne'e iha liu rai okos no la hatene maran maske iha tempu bailoro naruk. Preokupasaun ida ne'e comunidade hato'o ba iha instituisaun oi-oin maibe la hetan resposta ne'ebe positivu.

Progresu

Pilotu: Remata ona

Faze 1: Remata ona

Faze 2: Etapa 12

- Enkontru Akontabilidade Final, Auditoria & Evaluasaun.

Faze 3: Etapa 10/11

- Hahu Konstrusan
- Realiza enkontru Akontabilidade Primeiru


Faze 1 Siklu 2 : Etapa 6/7

- Verifika Proposta Projetu
- Preparasaun ba planu Detalhu




Prioridade sira Iha Nasionál

Faze 1



Faze 2



- Saude
- Bee Mos no Saneamentu
- Edukasaun, Cultura e Desportu
- Agricultura, Siguranca Alimentar no Buka Moris
- Dalan, Ponte no Kontrolo de Cheias
- Solidariedade Sosial
- Sektor Seluk

Formasaun Kona-ba Igualdade Jéneru no Inklusaun Sosiál Iha Implementasaun Programa PNDS

Sekretariadu Tékniku Programa Nasionál Dezenvolvimentu Suku (ST-PNDS) hala'o formasaun loron rua (2) ba vogál point Jéneru husi Munisípiu 12 ho Rejiaun Espesiál Oe-Cusse nomós Ekipa Jestaun Suku, kona-ba Jéneru no Inklusaun sosiál (Dili, 28-29/09/2015).

Atividade ida ne'e ninia objetivu atu fó informasaun ba vogál point jender ninia oinsá atu bele minimiza dez-igualdade jéneru hodi atinji ba iha Igualdade jéneru liu husi política abordajen integradu jéneru hodi ajuda governu (estadu) integra perspetiva igualdade jéneru iha planu dezenvolvimentu no nia implementasaun.

Kordenadóra Jeral Programa PNDS, Dulce Guterres Junior hatete katak: "Programa ne'e hodi fó informasaun ba partisipante sira oinsá atu hakléan koñesimentu kona-ba igualdade jéneru no inklusaun sosiál liu-liu ba planu estratéjia ho planu asaun ba jéneru ne'ebé sira rasik hala'o hodi bele hadi'a programa PNDS atu nune'e maluk feto sira bele partisipa barak liu iha prosesu tomak iha implementasaun programa PNDS iha nivel aldeia ho suku.

ha parte seluk, Laura Pina, nudar Enkarregadu Diretóra Fundasaun Patria, ne'ebé sai hanesan orador iha formasaun ne'e orgullu ba programa PNDS tanba iha programa ne'e fó importánsia bo'ot tebes ba envolvimentu maluk feto sira, liu-liu iha parte kapasitasaun ba feto sira hodi nune'e sira bele envolve ativu iha prosesu dezenvolvimentu nasaun.



Vice Ministru da Administrasaun Estatal, Tomas do Rosario Cabral ofisiál Inagura Projetu PNDS hamutuk 42 iha Munisipiu Manatutu.

Inagurasaun projetu PNDS ba extensaun sala eskola Primaria Polaka iha Suku Orlalan, Postu Administrativo Laklubar Munisipiu Manatutu mak hanesan inagurasaun ofisiál ba projetu PNDS husi Fase I no Fase II hamutuk 42 ne'ebé implementa iha Munisipiu Manatutu. Projetu hiraq nee ofisiál inagura husi Vice Ministru da Administrasaun Estatal Tomas do Rosario Cabral (22/10/2015).

Vice Ministru da Administrasaun Estatal, Tomas do Rosario Cabral hafain inagura projetu hodi halo mos inspeksaun ba facilidades ne'ebé perpara ona, husu ba comunidade no parte eskola atu kuidadu didiak facilidades hiraq nee bele dura to'o tempu naruk hodi utiliza ba prosesu aprendizajen alunas sira iha eskola ho diak.

Tuir Vice Ministru Iha mudansa Política implementasaun programa, Administrador Postu mak sai nain ba Programa nee no Administrador Munisipiu mak sai hanesan coordenador ba implementasaun programa nee iha Munisipiu, atu nune'e Administrador postu sira hatene katak programa nee hala'o duni iha suku laran. Vice Ministru hateten programa PDIM no PNDS hanesan programa rua ne'ebé integrado ho programa Desenvolvimento Integrado Munisipal. Tanba nee programa PDIM tengki hakbesik ba programa PNDS atu bele reforsa programa PNDS hodi responde difikuldades ne'ebé comunidade sira enfrenta.

Entretanto Chefe da eskola Primaria Polaka, Jasinto Sarmento ne'ebé nudar mos comunidade iha suku nee, hato'o agradese ba governo tanba bele responde ona comunidade nia difikuldades, liu -liu falta de sala eskola. Hanesan comunidade Sente kontente tanba antes nee sira falta fatin hodi hala'o prosesu aprendizajen.

Atu hetan informasaun tan:
www.pnds.gov.tl
info@pnds.gov.tl

Atu fo imi nia hanoin:
keixa@pnds.gov.tl

